

國粹叢書第三集

子遺錄

國學保存會印行

子遺錄序

京師遇桐城戴田有讀其文超卓有雋氣無時俗鈔錄經傳及柔莫惰滯之  
 態既又出所著子遺錄示余蓋紀其邑被兵始末而旁及江淮楚豫秦晉  
 勢上自文武大臣賢不肖用舍廟算得失下逮匹婦節烈一介士之才莫不  
 觸類引緒錯綜貫穿以著其詳予嘗以為上下不同心中外不一體小人  
 私而君子未必公使不肖者借口而賢才不得盡其用天下魚爛癘潰坐視  
 不可救藥此明之所以亡而田有於一邑紀載中具見原委豈特賞其文筆  
 之工已乎且夫撫之功大於勦而和不如戰所從來矣然各有時宜難以例  
 論賊勢既成驕獷譎變未經大創烏可言撫已既不能制人戰不勝守不固  
 又有腹心大患而與已敵者誠心百計請和指天誓日願休息者數四何必  
 不聽蓋與龔遂宗澤諸人時勢相去不啻天壤乃大臣無識不能確見其是  
 非身任天下之利害拘牽成說避文網畏彈劾依違拱手聽社稷自為安危

226, 806  
212

927727

而言官冥悍無忌憚惟陽以大言樹威勢陰以恩仇報復快其私嗚呼使當日諸臣赤心同憂國恤去門戶信任賢才揆情通變定和議於外合力據險出奇勦賊於內內外既寧民得休息不出十年天下可以復定甲申三月之禍何由而成哉嗚呼此予讀子遺錄所以掩卷拊膺長太息者也

子遺錄

桐城戴田有撰

順德鄧 實校錄

桐城居深山之中地方百餘里一面濱江而羣山環之山連亘千餘里與楚之蘄黃豫之光固以及江淮間諸州縣壤地相接犬牙錯處雖山川阻深而人民之所走集皆爲四達之衢桐之西有嶺曰挂車東有關曰北峽皆險阻地昔者三國之時吳人所以圖曹休也几桐之境西至於潛山又西至於太湖宿松西南至於蘄黃南至於安慶桐卽安慶所屬邑也東至於盧江無爲州東北至於舒城又東北至於廬州鳳陽北至於六安英霍又北至於光固自前世天上有變桐必受兵明高皇帝起江北定中原王迹實由此興而建都南京則桐爲王畿內地自是天下承平且三百年桐士大夫仕於朝者冠蓋相望而持節鉞爲鎮撫者徧天下四封之內田土沃而民殷富家崇禮讓入習詩書風俗淳厚號爲禮義之邦當萬歷晚節天子倦勤而士大夫文恬

武嬉抑又甚焉凌遲至於崇禎天災流行盜發秦隴天下爲之騷然而所在  
奸民皆思乘間爲變崇禎三年桐四野鬼哭四年有鳥集於四郊其形如鴉  
其色亦有史生者遼東人也舉家遷桐數年矣見而嘆曰兵火其將作乎是  
爲火鴉也其兆之矣遂挈其家去六年東門外地湧泉如血七年八月縣人  
黃文鼎汪國華反先是縣士大夫類多長者皆有德於其鄉而民莫不畏官  
府敬士大夫迨天啟崇禎中世家鉅族皆習爲淫侈其子弟僮僕往往侵漁  
小民爲不法於是奸民積不能堪而兩人遂爲亂首燒富家第宅掠金錢建  
旗幟營於北門之外司理薛之垣自皖來與賊誓於神而去安池兵備副使  
王公弼率其將潘可大討賊次於練潭不敢進賊勢益張當是時縣人職方  
郎方孔炤致仕家居得民心亂人獨不犯職方家職方因誘致亂人而盡殺  
之王公弼聞桐亂已定乃率師如桐而賊警適至桐人田田可大駐桐防守  
是年蜀之筠連人楊爾銘來爲縣爾銘年少有奇才爲桐七年民愛之如父

母禦寇治兵皆有法度。桐之不亡，由兩縣令之力居多。兩縣令者，爾銘之後。爲張利民也。其後明亡，爾銘棄官流落江湖，以死而張利民逃匿山中不出。桐之父老，至今歌思之。崇禎八年正月，流賊犯桐，先是流賊起秦中，渡河曲，燕南河北皆苦之。然而京師峙其北，黃河遶其南，賊禍不能徧天下也。賊入晉而秦以爲功，賊入豫而晉以爲功，行間大吏大抵皆玩愒縱賊，賊禍遂不可支。當賊之渡河而南也，河南巡撫元默不爲備，賊乃乘堅冰自澗池渡河，河南郡縣皆陷。浸尋及於鳳泗而江淮楚蜀之間處處皆賊矣。賊之衆且百萬蔓延往往千餘里不絕，或曰三營或曰五營或曰十三營，名號甚多不可得而詳書也。而張獻忠尤爲兇殘且狡，羣賊多附之。潘可大兵單弱不能禦寇，楊爾銘與縣士大夫謀設守，每陣十懸高燈，一二十火毬，一五十置小砲，一百大砲，一譙樓，下各貯火器，召募勇士百餘人助潘可大城守，而賊前已破鳳陽趨舒廬，長驅至桐矣。初賊在河南也，縣人孫晉爲給事中，告於兵部。

尙書張鳳翼曰羣盜今且逼鳳泗鳳泗破桐皖其必不免爲之奈何尙書笑曰公江南人也何憂賊乎賊秦人不食江南米賊馬不飼江南草賊不犯江南決矣人有聞者皆笑之至是賊至桐潘可大接戰於東郭外兵敗死者百餘人賊射可大馬中之馬蹶而可大顛部卒劉應龍以己馬付可大乘之而走將入門可大又墜地賊急追之應龍持矛與賊騎戰於衢隘殺賊五六人賊不能前比賊殺應龍鞭其馬進則城門已闔矣是爲乙亥正月二十七日也先是賊所至皆用土著爲鄉導以故道路曲折及虛實堅瑕莫不盡知之由此勢如破竹桐之奸民已前死無與賊通城以故獲全明日賊奮力攻城以巨絙聯木板藏其下負以趨名曰木牛鑿城城堅不能入城上人以大石擊之多傷又造梯數十長數丈擁至城城上人以砲石擊之不能近於是焚居民屋舍風舉火烈守陴者不能偪視乃鼓譟欲登城又射却之而乘間下擊殺賊以百數凡攻三日不能破乃求賂請罷去而徽人黃仙崖獻砲以木

爲之貯以火藥藏火線請謬謂金寶給賊而先以眞者餌之賊喜遂以袍數十懸而下賊爭取之至賊手火發皆糜碎於是賊度不能攻遂拔營而西至潛山城外居民死傷者數千人向者烟火萬家至是幾盡矣賊殺人之慘不可勝言嘗掠民間一婦有美色賊渠置之座上飲以酒婦覆酒擲杯於賊面曰吾良家子女不幸落賊手速死爲幸安能從賊飲乎且泣且詈賊大怒曰姑勿殺吾當衆辱之且日縛婦於河橋之柱裸而磔之寸寸以解城上人望見無不流涕者自賊西去楊爾銘移文上官叙潘可大城守功而請恕其取兵之罪於是可大駐桐如故爾銘進父老諸生而告之曰今賊雖已西而飄忽不可測城守之事當與父老諸生早計之於是諸生邱山等及父老百餘人具十議以進一修城門一增窩鋪一修女牆一請援兵一備兵餉一嚴偵探一設常住兵一核文移一詰奸究一增火礮藥弩爾銘曰兵食及文移往來其權在上官當往請之餘縣中可自辦也於是諸生往蘇州謁撫軍張國



維請增潘可大兵一千二百軍資餉金取給於正賦而給礮大小共二百餘  
上下文移俱有輪環字號蓋賊是時多於途中却取文移詐爲官兵入城城  
往往陷以故文移尤宜謹焉五月上命史可法監安廬軍可法宛平人起家  
進士嘗著患政關中異時故有安池兵備而池在江南安在江北當賊亂時  
池懸隔大江不罹賊禍於是朝議改安池道爲安廬道駐廬州可法有大將  
才痛自刻厲與士卒同甘苦大小數十百戰俱以已先三軍可法馳驅江淮  
間衣不解帶輒至十餘日軍行不具幃幕襪被當天寒討賊夜坐草間與一  
卒背相倚假寐須臾霜滿甲冑往往成冰欠伸起氷霜有聲憂憂然愛民敬  
士所募健兒俠客皆得其死力雖古名將莫過也八月賊衆萬餘人自豫逼  
鳳陽穎毫大震史可法命總兵許自強率兵五千守桐而自引兵三千至廬  
州當賊賊自穎毫入英霍山中出舒城至桐可法回軍駐北峽關與許自強  
爲犄角賊復由英霍走黃麻十月賊復由黃麻走鄖陽又轉入太湖潛山史

可法率潘可大等禦之於潛山賊又入英霍十二月許自強率吳淞兵三千與可法駐北峽關是時流賊李自成等圍滁州明年正月總理盧象昇總兵祖寬大破賊於朱龍橋滁州圍解天子以賊勢蔓延建牙之吏不足任討賊於是以太監慮九德率京營兵征豫楚諸賊而以黃得功宋紀隸焉黃得功者遼東開原衛人起家行伍生有神勇殺賊賊不敢逼視得功一部皆爲精兵每與賊戰輒飲酒數斗提鐵鞭上馬前自衝陣而一部隨之得功威名震於賊中賊相戒勿於黃將軍苦戰一時名將如曹文詔早死不竟其功而左良玉養賊自重迄以亡國鄧垓許自強輩尤齷齪庸懦不足數而盧九德惟賄是狗賊急輒募羣僧誦佛號以祈免死於是江淮之間以得功爲長城矣賊聞京兵之出也其在豫鳳者多奔楚二分其軍一犯德安一趨江北據山扼險以英霍爲窟穴五月賊自英霍出掠潛山史可法禦之部將朱三才斬賊首數十六月賊夜襲可法營遇伏走當是時關外有警兵部因移制府洪

承。疇。於。薊。遼。虛。象。昇。於。宣。大。而。以。熊。文。燦。爲。總。理。文。燦。畏。與。賊。戰。一。意。招。撫。賊。弄。文。燦。文。燦。莫。之。知。賊。由。是。大。橫。十。二。月。賊。由。黃。麻。至。潛。山。明。年。正。月。至。桐。潘。可。大。守。桐。史。可。法。守。皖。先。是。賊。之。至。也。沿。途。剽。掠。而。已。至。是。深。山。大。澤。鄉。村。聚。落。皆。賊。騎。充。斥。人。死。無。算。近。山。者。逃。入。深。林。叢。薄。天。雨。凍。死。又。或。因。小。兒。啼。聲。搜。捕。無。得。免。者。於。是。人。多。自。殺。其。兒。惟。濱。江。湖。者。泛。舟。而。逃。乃。免。而。縣。中。巨。族。多。有。渡。江。而。南。者。賊。至。西。山。山。之。阿。故。有。一。老。嫗。鄰。女。多。奔。嫗。家。避。匿。居。有。頃。人。報。賊。且。自。山。外。來。諸。婦。女。皆。懼。啼。泣。不。知。所。爲。嫗。曰。以。吾。一。人。死。而。易。若。等。生。若。等。速。走。毋。涕。泣。爲。也。因。扶。杖。出。曰。且。日。當。於。某。地。覓。我。嫗。遂。至。路。口。賊。尋。至。曰。嫗。亦。知。此。間。有。馬。牛。女。子。乎。嫗。曰。知。之。賊。曰。導。我。往。不。然。且。殺。汝。嫗。乃。前。行。羣。賊。隨。之。嫗。故。紆。迴。引。賊。他。往。凡。數。里。不。前。賊。趣。之。嫗。罵。曰。死。賊。吾。向。者。誑。若。此。間。荒。僻。那。有。馬。牛。女。子。也。賊。怒。拔。刀。刺。嫗。而。去。當。嫗。之。誘。賊。去。也。嫗。家。婦。女。盡。奔。入。深。谷。林。薄。皆。免。明。日。使。人。於。某。地。覓。

嫗果在尙能言昇之以歸遂死賊至龍山居民斷溪橋賊不得渡執一男子使治橋曰治橋免爾死男子曰余一人豈衆人遂當死乎卒不治橋賊殺之是時縣中設守嚴賊分騎野掠四封之內皆賊而盧九德左良玉黃得功宋紀皆急廬鳳不遑救桐史可法守皖恐兵渡江而禁江上縲牖無泊北岸二月賊衆往攻皖至練潭知有備乃還二十七日賊北去遺民逃匿者聞賊去多出明日賊復回多捕殺之史可法引兵至桐路遇賊大戰救百姓千餘人以還凡男女死者十萬餘人被虜者不與焉史可法謂楊爾銘曰賊勢甚盛俱在商固穎毫間盤旋出沒安廬一帶兵多餉少何以克濟君與縣人當爲久遠計於是公議三策行之一立桐標營立官主之賊去則偵賊來則守一築欄馬牆繞城外築土牆使避難之民居之內以護城外以防賊一立堡寨以遠鄉之民無可守之險無可戰之人輒至屠滅乃相視險隘築堡立寨立長主之賊去則耕賊來則守而于城四隅各築礮臺是月李樹結實如王

爪三月皖兵敗績于鄴家店參將程龍潘可大等死之初可法率程龍等禦賊于潛山夜聞二鬼哭於幕下可法憂之至是兩將皆歿總兵左良玉過桐  
兵二萬有餘輪蹄雜遝絡繹百有餘里良玉留三日軍于東郭外縣士大夫  
出謁之良玉曰賊就撫者十之一擒者十二三戰死者十四五然而日引月  
長滋蔓不止者歲飢政亂奸民無以爲生故相率從賊耳與王師戰勝則乘  
勢長驅敗則散金錢於地名曰買路以故軍中縱賊者多縣士大夫曰闔外  
諸君豈皆受賊賄乎良玉曰無不受也但良玉左手受金錢右手卽斷賊頭  
耳縣士大夫曰由將軍言觀之賊終不可滅乎良玉曰滅之亦無難也但今  
日者內外異心功垂成而禍及之故主兵者莫肯殺賊耳吾恐國家之大患  
終必由此也四月總兵劉良佐率兵七千守桐良佐殺賊亦有威名每乘班  
馬破賊故賊中稱之曰花馬劉云閏四月賊大掠桐西而史可法方奔潛太  
之急桐之與潛太皆爲豫楚之衝官兵與賊之往來者無時無之而潛太兩

縣舊無城郭以故受賊禍尤烈。可法欲築城于潛太與桐城爲犄角。量地授工。築有日矣。而賊自英霍出掠潛山。可法禦之。賊小却。凡十餘日。賊來益衆。而官兵止二千餘人。賊圍之數重。皖兵夜從間道往救之。殺傷過當。可法知救至。乃命部將朱三才奮勇大戰。賊圍始開。軍行至雞鳴。賊復追之。且戰且走。乃全軍還皖。至是可法爲桐請救于鳳陽總兵牟文綬。文綬率其兵來與劉良佐同拒戰於石井。深入賊圍。大戰不決。軍中食盡。楊爾銘使人呼于市曰。官兵圍賊。賊且敗矣。軍中不暇作食。縣人當速濟之。於是人家各炊熟米。麥數百餘車。募壯士強弓勁弩。護入軍中。既得飽食。而縣人夜持火炬。鳴金鼓出西門。取山徑。譟而前。賊疑救兵。且至。遂解圍去。是時廷臣議以安慶重地。宜設一軍。而以史可法爲巡撫。割楚之黃麻。豫之光固。皆隸焉。可法于是設五營。以副將廖應登領兵一千五百。爲前營。杜先春領兵一千五百。爲左營。李自春領兵一千五百。爲右營。汪鎮國領兵一千五百。爲後營。以朱

三才爲中營以某爲制勝營以某爲水師營共萬餘人而桐城當賊衝乃立桐標營以部將張韜主之張韜江南人狀貌文弱而有勇力身任殺賊常棄大營趨利可法甚愛重之可法部署既定因遂親巡所屬州郡間民間疾苦拊循軍士七月至桐城而左良玉亦自舒至兩人杯酒論兵良玉曰勦賊譬之逐鹿鹿之性善奔使前無所禦而第自其後追之安能得鹿惟巨網張于前而利兵隨其後鹿雖善奔不能逸也今豫楚之兵誠能禦之於前而江淮之兵追而捕之此逐鹿之術也明公與制府諸公共圖之良玉介冑之士嚴整部伍以聽約束而已居數日良玉西去而可法北巡廬六光固而還當是時豫楚諸撫軍皆以空名得節鉞無能爲國討賊可法無與共功名賊勢愈不可支矣八月賊自英霍分隊而出一走黃麻一走潁亳一走潛桐一襲廬江無爲州謀渡江可法命廖應登扼舒州山隘杜先春扼桐城山隘別遣將守江命兵備副使湯道衡守合肥而自率大軍南兵萬餘人禦賊於潛山傳

檄盧九德左良玉以兵來會賊走斬黃而賊小袁營過天星等又謀襲六安可法引兵救六安賊復走英霍掠太湖十月潛太告急可法回軍來救遇賊于潛山賊小却頃之賊全軍皆至圍可法數重可法火器已盡賊圍之急可法斷梁柱如礮狀臨高向賊營佯欲擊之賊却可法因冒圍而出汪鎮國爲殿可法登舟墮水中部卒焦承恩入水援之乃免可法以承恩爲守備明年爲崇禎十一年戊寅總理熊文燦受張獻忠降全楚兵吏皆以爲不可巡撫方孔炤爭之尤力文燦不從已而獻忠叛于穀城左良玉追擊之復縱獻忠去詔逮文燦大學士楊嗣昌出督師嗣昌傳檄孔炤守襄陽而調其標將與川沅兵合擊深入至香油坪川沅兵失期不至遂敗嗣昌歸獄於孔炤孔炤罷去是時嗣昌亦不能制獻忠矣盧九德守承天聞賊在潛桐間遣黃得功來救得功出賊不虞殺賊數百騎賊入山不出而賊中食乏時時自間道掠鄉村朱三才率兵多捕獲之史可法以其間築潛太城而桐亦築寨凡數十



遠近之民暫得所棲泊而諸寨先後皆破不能守也是年方孔炤亦發軍資火器助桐城守一日朱三才飲酒醉握刀上馬入山中殺賊得功慮其敗也率數十騎隨之三才遇害得功怒提鉄鞭擊殺賊騎數百而還是時得功兵僅二千餘人俟盧九德至桐會戰而九德又入豫不能至得功兵軍舒桐間已卯春史可法以母喪歸繼可法者爲鄭二陽二陽行軍儀衛甚盛然恇怯不知兵賊皆椰揄手笑之三月盧九德左良玉至桐四月張獻忠自蜀入楚左良玉奔楚之急盧九德亦援河南時朝議皖兵新設兵勢單弱不能控御州郡於是設一兵備道駐太湖而以太湖知縣楊卓然爲之卓然楚人與宰相楊嗣昌善嗣昌之代熊文燦督師也薦之于朝先是卓然欲入山說賊使降計未決無何賊西自楚來縣人登陴設守適鄭二陽在桐聞賊至倉皇莫知所爲乃撤譙樓大礮置署門外以備破城巷戰且以其所著陰德書出示士民而戒民間勿捕傷禽鳥一縣中皆笑之李蟲兒者諸生李克之僕也被

虜逃回至城下縋之以入二陽使人召蟲兒問賊中事甚悉賊尋入英霍二陽忽斬蟲兒于郭外而以擒斬賊首李重耳報聞又繪各堡寨圖奏覽謂星羅碁布足以控制羣賊令其首尾受敵賊可旦暮平也當賊既退二陽分兵入山名曰捕賊賊既去遠矣命所過堡寨俱聽官兵出入於是堡寨多被掠諸生邱山等謁二陽而愬之二陽曰兵之出征猶諸生之赴試也兵入山叩堡寨猶諸生赴試投逆旅主人也叩寨即云破寨投主人即云劫主人可乎諸生逡巡而退由此兵益驕庚辰夏四月賊掠桐之控口都司張韜死之六月皖兵大敗於楓香驛游擊杜先春張士俊等死之七月鄭二陽命廖應登守桐而以杜先春兵屬焉先春部將羅九武不悅由是與應登有隙十月盧九德等駐桐先是楊卓然見賊盤踞深山欲說賊使降乃從十餘騎入潛太山中說賊勸其歸命賊渠與卓然握手飲酒甚歡且曰我等皆有絕世之才朝廷無所用余故皆因飢荒爲盜若國家處置得宜焉知不可爲忠義之士

乎且吾聞劉國能李萬慶十餘營前後歸誠爲國家效死戮力行間顧余獨不能乎但吾衆且十萬餘置之何地主之何人餉從何出而以何等官爵待吾也於是卓然舉手別賊而出告於鄭二陽二陽移文豫楚諸軍毋得殺賊賊亦禁焚掠以待朝命盧九德還鳳陽黃得功駐盧州宋紀駐桐城楊卓然入京師面見天子及公卿議之公卿皆曰賊謀甚狡不可信穀城之變其明效大驗也且賊欲擁衆仰食縣官歲費金錢巨萬今東南諸郡縣死亡過半土田荒蕪正供無有新增軍餉大半取給江南何處更議增稅畝此事未易言也桐之人相與謀曰往者賊衆四分剽劫勢如飄風不可捕捉今賊聚於窮山之中且且飢餒當此之時誠以楚兵壁蘄黃豫兵壁光固南兵壁舒桐予黃得功左良玉通侯印而拜史可法爲大將軍節制諸軍提邊兵禁旅捲甲疾趨此滅賊之一時也乃黨禍方烈廷臣日以門戶相爭漫不以賊爲意豈不悖哉辛巳正月流賊李自成陷河南府福王遇害是時桐有征糧之擾

先是朝議以禁兵在舒桐間卽以桐城漕米給禁軍而以戶部主事時方煜來徵發自兵起土田多荒歲復惡民死亡過半桐之遺民竭力以供正賦而戰守之費不與焉至是方煜督之甚急楊爾銘不能卒應請少緩之方煜不從一日爾銘方坐公堂方煜之從者直上仆爾銘於地而手格之百姓皆忿譟于方煜署門外方煜疑變踰墻走至諸生王燾耀家百姓慮方煜出城引兵入也環王生宅王生出教爾銘諭衆使退而使教官王熙章典史張士節置酒王生家謝方煜王生力保無他虞方煜與王生及熙章飲于庭夜半還署且日方煜報鄭二陽盧九德以桐民爲亂二陽右方煜且歸罪縣諸生久之乃解當楊卓然之主招撫也廷議未決卓然還太湖候命而賊亦覺朝廷無意赦之俱乘間欲起二月張獻忠陷襄陽督師大學士楊嗣昌卒於軍中三月潛太諸賊出山焚掠且抵桐境宋紀獲賊諜宰八手等十餘人盧九德欲以爲質留宋紀軍中不殺是時禁兵將謀夜叛宋紀擒其魁七人者斬之

乃定四月九德駐鳳陽得功守舒桐五月九德傳檄宋紀至鳳陽與小袁營會戰宋紀始行宰八手逸去諸賊大半移于桐城山間六月桐標營張寶山夜入山襲賊死之先是魯烘山中有寨曰虎頭寨寨人屢襲賊殺之至是請寶山入山爲助寶山以七十餘人往猝遇賊衆皆潰寶山與蜀兵十六人駐山隘自守賊圍殺之自是諸營以寶山爲戒無敢襲賊者矣寶山者蜀人總兵鄧圯之小校也爲巡撫陳良訓所知以書薦之於史可法戊寅三月可法命寶山率其屬守桐適遇賊于桐之南郭外城上人望見一將率數十人者與賊戰大呼格鬥賊皆披靡始不知爲寶山也既勝乃開城納之後屢襲賊有功至是敗沒桐人莫不傷之而桐之諸堡寨刀兵夜出大有聲前後皆破滅土寇亦起小兒腹疾死多棄於市而疾疫亦漸作矣鄭二陽命廖應登自舒守桐應登之徒不敢入北峽關黃得功送之應登兵旣入關賊自山中逆之應登兵大潰得功有愛將曰林報國每用兵報國輒爲前驅賊畏之亞於

得功至是報國至而賊趙虎者佯北誘報國深入殺之羣賊正相賀而得功突入虎陳斬虎賊衆復潰而走賊中有勇將年少嗜殺號無敵將軍於是無敵將軍呼於陣曰汝曹何怯也吾爲汝曹擒黃將軍來衆賊皆按轡觀之無敵將軍奮勇大呼馳至得功前得功立擒之橫置馬上右手按其背左手策馬去賊衆大驚潰於是應登潰兵乃得會于桐七月兵備副使張亮至桐亮有俊才鄭二陽倚之如左右手是時環桐之境皆賊桐萬分孤危於是議撤皖兵守桐九月楊爾銘以卓異徵入京師授御史桐人攀挽涕泣祀爾銘於浮屠老子之宮十月有賊數十詐爲民負米入城人有匿草間者聞其謀間道至城告之有傾賊果至伏壯士皆擒殺之是時皖兵盡至桐營於牆內賊馬守應等共五營營于河外相距不及一里而桐之堡寨亦多破散民相攜入城流離死亡殆盡城中食亦匱多餓死或割死人肉以爲食十二月晦日皖兵忽入東門居城上數日復下入人家劫掠民飢餓不能支皖兵十百爲

羣橫行縣中當是時署縣事者爲教官王熙章束手無策典史張士節秦人性伉直有氣概集少年數百而告之曰賊亂於外兵亂於內一縣之中如困湯火今吾與若等潰圍力戰或以是激厲三軍之士而少紓賊禍少年皆從之於是歃血祭纛每夜出襲賊斷賊頭奪其馬牛及其糧食皖兵輒邀劫之於路而爲所殺者皆官兵於是少年皆逃散不敢復殺賊壬午二月賊野掠盡乃皆拔營去官兵亦出城城中稍甦息而疫大起死者無算張士節亦死三月張獻忠潛屯北峽關遣數十騎夜襲南城梯而上而守陴者有張科夢神呼之起起見賊遂手格之賊驚皆墮復擁而上張科大呼而城下居民聞之皆上城與賊戰賊皆復墮獻忠謀不成乃去自辛巳春賊入桐至壬午二月始去遠方之民避賊於縣者相扶攜還家暫得休息而又有楚兵爲害之事皖楚之用兵也相爲唇齒楚聞桐之急也遣五千騎來援楚兵至而賊已退楚兵貪其無賊也遂留不去焚掠畧等於賊桐皖之間皆苦之縣人姚孫

渠方爲荆南副使，諸生致書荆南，轉告撫軍，乃撤回。楚五月，張利民來爲縣令，利民、福建侯官人，爲人長者，多惻怛。爲桐數年，掩骼賑飢，荒撫綏流，離誅鋤奸滑，捕土寇，省獄訟，治兵，給食，其聲名與楊爾銘等。是年，鄭二陽罷，而楊爾銘徵入京師，已掌河南道御史。諸生邱山、客爾銘家，當是時，有給事中劾黃得功，擅殺桐將張寶山、邱山，請爾銘上書白其冤。爾銘猶豫未決，曰：「言官劾之，而言官救之母，乃不可乎？」邱山又以告給事中孫晉光、時亨，兩人皆縣人。於是兩人教爾銘具疏，叙得功功在江淮，天子乃以得功爲都督。加宮保，予禁兵三千，用兵江淮。豫楚間七月，黃得功至鳳陽，率兵破張獻忠。獻忠遁走。九月，張獻忠自無爲州間道至桐園，之誓必破桐，桐急請救於得功。得功來救，斬賊數千級，得功射獻忠中之，復舉刀向獻忠，而得功馬蹶，乃易馬追之。獻忠逸去，多棄牛馬於隘，以塞道。得功馬不能馳，賊奔已遠，遣民男女數千人救之，以還縣。諸生父老出謝，得功曰：「諸君守城勞苦，得功。」



殺賊是其職。何謝也。前日科臣奏得功。擅殺部將。久之不能昭雪。夫斥一武夫。何足輕重。然賊乘間破十三州縣。生靈幾盡。誰之過也。天下事大抵破壞。於此輩不可爲矣。因饋諸生牛二頭。父老等牛五頭。而引兵還鳳陽。諸生及父老賣牛築宮以祀之。是時張亮亦至桐。見利民調度從容甚整。嘆曰。桐之不陷。不獨黃將軍功也。賊既去。自春徂夏。不雨。民大饑。土寇四起。自稱將軍。掠民財物。張利民開誠勸導之。賊渠孫計欲散其黨。江務不肯殺孫計。利民使人擒江務。斬之。自是土寇多散。而獻忠又且從黃麻至矣。廖應登營於城西山巔。適應登生口諸生往爲壽。應登曰。獻忠在黃麻游騎。及于潛。太意在破桐。否則誓不去也。諸生曰。何以禦之。應登曰。頃者賊破六安。得其軍士火器。破太湖。又得其軍資火器。今來攻爲必以大礮憑高下發。守陣者難以立。則城危矣。今吾先屯於此。賊雖至無險可據。黃將軍聞桐急。必引兵來救。賊不能攻桐也。且吾夜觀城中氣亦旺。桐必無患。但夜過半。輒有鬼數千繞余。

營而號是可怪耳是年史可法服闋起爲淮陽巡撫總督漕運一日廖應登從竇成等二十餘騎至廬州謁可法行至舒城方解鞍歇馬忽有賊數十騎突至虜應登及竇成以去蓋獻忠兵也報至桐應登部將羅九武登陣設守有頃賊挾應登至城下使之招降城中兵應登大呼曰吾已被執爾士卒可速降此時城外精騎不過五十人其機不可失也少緩則全營皆至不可爲矣蓋應登佯爲賊說而陰示以賊中虛實欲九武出襲賊也九武故與應登有隙佯不解應登意乃罵曰被執不能死是卽賊也應登曰吾寒甚可飲我酒九武不應彎弓射之賊擁應登去有頃殺之干沙河當應登之將往廬州也有兵二人故降賊忽騎而去數日乃還或疑其往賊中教賊執應登於途蓋九武之謀也賊旣擁應登去數日復擁竇成至城下教之招城中兵降竇成呼曰我竇成也賊使我招降若等若等宜堅守今賊計窮矣其糧盡火藥亦盡若等努力無懈當速請兵來援吾死矣吾死以活若等及縣人賊怒殺

之成至死猶大呼不絕於是城上人具香焚之烟縷起屬天相與望城下流涕而拜後立祠於城內西山之麓成死之日是爲壬午十一月二十一日也獻忠乃率其全營環城攻之自屯於城西山巔俛瞰城中故卽廖應登之所營也賊於山上放礮擊城越城而墮自傷其卒乃驅被虜百姓伐樹覆土築高臺期與城平城上礮石藥弩擊之築者皆死死卽覆土於其上城上矢石如雨而築者不休每十步一賊將督之築者稍緩卽殺之賊之督者數十人以凶具自遮蔽矢石不能傷又掘隧道欲穿城而入凡五日城中糧食火藥將盡衆皆懼莫知所爲張利民亦使人築臺於城隅加高一丈五尺俛瞰賊臺以矢石擊之賊不能前又出精兵數百殺賊山上賊與兵相持因以其間懸勇士下舉火燒賊臺臺土少木多遇火皆燃賊暫退城中氣稍振然恐賊隧道將穿乃值賊隧道之地築小城俟其穿卽擊之復募勇士雷鳴道王祥董目趙仁甫方宣等共十人各挾刀持鉏縋而下視隧道深淺城上人舉礮

發矢以護之賊率衆來戰王祥中礮死董自中賊鈎失其一耳賊又鈎趙仁甫臂雷鳴道大呼殺用鈎之賊衆乃前視隧道深僅盈尺下皆石谷不能穿於是鳴道等復繼而上城中守益固賊計皆窮城中因發大礮擊賊屢發不能中或曰礮故有靈當祭以牲醴於是張利民嚙指出血以祭之比發中獻忠愛將李混江頭裂而死獻忠獨脫移營下山去初賊虜婦女裸其體跪於山上向城而罵城上舉礮礮不鳴乃取黑犬向城外殺之礮乃皆中是時守陣者日夜力已竭目盡腫皆思逃散張利民告於衆曰桐困極矣忍死須臾以待救度城中兵食可支八日今當遣人間道請救於黃將軍度往還凡八日可至至期救不至士大夫及婦女皆自殺軍民逃散未晚也衆皆曰諾於是作書遣縣人林構朱正往約以四日到鳳陽兩人夜出賊營如約而至適安慶巡撫黃配元亦傳檄爲桐告急兩人擊軍門鼓與之偕入得功卽時出師兼程進如期而至日下春賊有自北來者呼於軍中曰走走黃家兵至矣

賊營皆亂倉皇棄其軍資而去羅九武開城取其輜重并斬賊之傷不能行者桐人歡聲如沸相慶更生得功自鳳陽三日行六百餘里至北峽關賊塞關以守前鋒至不能入頃之全軍皆至乃破關賊且戰且走黃將軍至城下獻忠已走數里矣將軍追及之獻忠呼曰黃將軍何相陋也吾爲將軍取公侯留獻忠勿殺不亦可乎得功曰吾第欲得汝頭耳何公侯爲也急擊之賊大敗獻忠走將軍縱馬追之而賊以輜重馬牛遺民男女塞道追少緩遂逸去夜半得功回桐明日縣人出謝得功深自辭讓而勞苦將士及諸生父老且曰賊已西去一二子遺當深耕易耨而戶口流亡室廬已盡今吾將所獲賊牛五百給與民間有司當勸耕無怠又告虞宗文與羅九武當終始立功名是夜賊復回襲營遇伏皆走明日復追之不及而還得功於是遂引兵北去越二日復至城下慮賊復來潛伏山中待之賊不至乃還頃之張亮至桐親巡戰處於是亮嘉利民功再拜謝之復拜謝羅九武虞宗文而厚賞

兩營將士爲文祭寶成哭之甚哀軍中皆感動祭畢厚恤成妻成妻亦賢守節以沒世焉先是土寇之未滅者乘獻忠之去復出剽掠張亮率兵次第擒滅之是時兩營將士凡五部十司自以城守功高驕悍不可法度治時却掠居民民不堪其命愬之亮亮多右民而左兵兵皆怨相謀作亂適黃得功劉良佐援楚過桐兵謀乃息癸未正月黃劉西入楚張亮還安慶桐兵益驕羅九武請於利民曰桐困極矣今幸逆賊遠遁瘡痍之餘稍稍自振縣故燈火甚盛請復舉以示休息不亦可乎利民曰不可恐滋亂階不如已也九武固請之於是軍中及民間各出燈火甚盛居數日軍民皆送燈公堂兵忽亂驅民盡擊之利民大怒旦日羅虞兩將自詣縣請罪而扶亂者桐人苦兵之擾也紛紛渡江而南張亮恐邑空虛難守禁之不能止是時安慶巡撫黃配元以母喪歸張亮行撫軍事二月天子以亮爲巡撫亮奏設總兵官駐安慶而羅九武虞宗文授游擊將軍永守桐城不行調發四月張獻忠陷武昌左

良玉避賊東下駐皖城兵六萬人淫掠江南江北桐人之避亂江南者家復破五月給事中左懋第奉命至皖給良玉餉百萬良玉回楚襲賊空虛之地名曰恢復而其民已盡矣先時庚辰辛巳壬午以來以用兵故歲復饑民力不支且恐齎盜糧故桐城漕米皆未輸至是上官移文補徵之桐人朝不給夕無所控訴給事中光時亨爲請免之而自乙亥以來江淮兵興旱蝗繼之疾疫復起桐人死者無算田畝三十九萬荒者十七八惟東鄉僻在江干不數經兵耕桑如故以故桐之稅糧皆取給於東鄉至癸未受左良玉之掠繼以田鼠食禾稼爲災稅糧無出於是諸生謁之張亮亦奏免十分之七焉初桐標營三千人廖應登領前營杜先春領左營羅九武爲先春部將已而先春戰死應登并領其衆九武由此不平後應登之遇害也九武有力焉張獻忠之圍桐也九武領前營虞宗文領左營九武不悅賊旣退九武欲領其衆謀不成張亮慮兩人之有變也命宗文別戍而以孫得勝領左營得勝木疆

質直而九武驕蹇於是兩人亦不相悅然九武權譎得勝每隨之俯仰以故卒與同禍自獻忠之退九武自爲城守功高桐之子女玉帛相隨入兩營者不可勝計癸未秋督師孫傳庭徵兵不應甲申春淮陽巡撫徵兵勤王亦不應是時歲復大饑兵餉無出張亮命士卒墾荒菜屯田兩營之兵皆掠民人爲之耕奪民牛橫行四郊劫行旅道路皆苦之張利民爲請於九武斬三人行旅稍通甲申三月李自成犯京師烈皇帝崩於煤山桐人聞之相對悲號不能寢食四月 大清兵入關李自成敗走西安五月史可法馬士英立福王世子卽位南京改元弘光頒詔陞賞將士而授羅九武孫得勝參將加副將銜兩人乘中外危疑益肆剽掠無忌當此之時總兵劉澤清轄淮海駐淮北經理山東高傑轄徐泗駐泗水經理開歸劉良佐轄鳳壽駐臨淮經理陳杞靖南侯黃得功轄滁和駐廬州經理光固號爲四鎮皆擁重兵羅九武孫得勝薄其官頗鞅鞅失望皖人阮大鍼者天啟中黨附魏忠賢烈皇帝立削



其籍大鍼故與馬士英善至是士英薦之拜兵部尙書大鍼不知兵徒以倡優媚人主而欲盡剪除向之異己者黨禍復烈八月大鍼親引兵巡江闔軍抵皖城自以歸故鄉張軍威示榮耀左右皆曼聲美色而倡優皆衣錦繡桐之兩營將士皆召至皖覲軍實於是兩營之兵自東抵皖掠百餘里比其還桐復自西抵桐掠百餘里而羅九武從數騎獨後夜宿道中密爲書付其嬖童前行教其兵作亂俟九武至桐乃止其童行未一里忽有虎自山出傷其童童死九武聞之大驚由此九武滅桐之計卒濡遲不決九月馬士英以楊鎮宗爲總兵駐安慶開藩置幕提督江南江北軍馬當是時士英及大鍼以爭黨報復恩仇避禍者多入左良玉軍中教良玉起兵除君側姦臣士英大鍼慮之故設大營於安慶名爲雄固上游實以備良玉十月張利民以治行第一行取入南京桐人送之泣下凡數十里不絕乙酉二月袁秉華來爲縣乘華自在南京聞桐之守兵驕橫求於兵部加監紀銜得以兼制軍民兩營

將士皆怒，燬由此起矣。縣士大夫曲爲之解，僅而不亂。頃之左良玉全軍東犯，安慶戒嚴。羅九武等乘間遂掠倉庫，辱乘華。有李大有者，九武之部將也。勸九武嚴飭軍士，九武不應。已而軍士殺大有於轅門之外。九武亦不問。桐人如在水火時，時莫必其命矣。左良玉之東犯也，死於九江。其子夢庚統其衆百萬蔽江而下。沿江州縣皆屠之。楊鎮宗部將馬進寶者，凶悍無人理。時欲叛及夢庚兵抵皖，進寶爲之內應。而鎮宗不知之。四月八日夜半，皖兵開城門納賊。皖人死者十八。九張亮走入山中。楊鎮宗走桐羅。九武迎鎮宗入居縣中。是夜九武命其兵作亂，大掠三日乃止。十七日分兵入西鄉，焚掠又數日。分兵入東鄉，南鄉北鄉，焚掠少婦幼男之被虜者凡五六千人。相號於道。楊鎮宗見之，扼腕歎恨。頃之靖南侯黃得功傳檄召兩軍將士至蕪湖。九武以其部將龐天泰領兵五百往，得功擊左夢庚於板子磯，大破之。夢庚敗走，淫掠安池間。皖兵叛者潰入桐城，與兩營合，無遠不掠。居有頃而大

清兵破楊州督師大學士史可法死之既 大清兵下南京聖安帝遁盧九  
德降尋至蕪湖靖南侯黃得功死之龐天泰降九武等尙持兩端縣幾遭屠  
戮賴諸生王雯耀說之乃定及 大清豫王遣將卜從善張國祿至桐城擒  
羅九武孫得勝等而散其所部兵凡所掠子女俱令釋去九武妻常氏有賢  
行罵九武曰不聽吾言及此禍吾不忍偷生也乃投井死是時楊鎮宗降  
大清仍授爲總兵鎮宗曰九武等爲江北害吾目擊也不可赦於是斬九武  
等於市自是天下漸定而桐潛之間時時兵起名曰義兵其實皆爲民害然  
皆不踰時輒削平非桐之所以存亡故不著

子遺錄跋

右子遺錄一卷桐城戴田有先生紀其邑明季被兵始末也予年十五於野史秘乘初有所擇考始得先生此錄讀之淵淵然不知涕之何從也予婦姚爲桐城人予故與桐之士夫多相習少長遊處每譚桐事與此錄輒證合益重悲之旣而求先生全集久不得嗣迺得安慶新刊本所謂潛虛集者則此錄亦附著而文字間有異同歲丙申張丈齋翁歸嘉興挾以俱去踰數月寄還則爲予斟定一過而加墨矣藏弄篋衍遂二十年今以同志鄧君秋枚有國粹叢書之刊以蒐羅往籍爲職志故出而付印蓋欲使吾國人讀先生之書而有以知先生也嗟虛先生嬰文字之禍其所纂著燼滅亡失不可見遺書晚出其僅存而得見者蓋舍此錄無以闕先

生之情趣矣原鈔本有序一通不著作者姓名今仍闕焉其言曰  
嘗以爲上下不同心中外不一體小人私而君子未必公使不肖  
者借口而賢才不得竟其用天下魚爛癰潰坐視不可救藥此明  
之所以亡而田有於一邑紀載中具見原委豈特賞其文筆之工  
已乎知言哉知言哉讀此錄者其亦省覽斯言而愾然有感於中  
耶丙午秋九月山陰諸絳記

光緒三十二年九月十二日首版  
光緒三十二年九月十二日發行

(國粹叢書子遺錄)

定價洋一角

著者

桐城戴田有

印行者

上海鐵馬路北愛而近路  
國學保存會

發行所

上海四馬路東惠福里  
國粹學報館

